

社會。成爲兩截。此亦奇異之現象也。(三)言龐事難。更甚於前。報界中之言龐事難。無可諱言。然迴想民國元二年。不啻若唐虞三代之盛。兩派各有極端之主張。爭論不已。固相若也。然彼時爲憲法問題。借款問題。財政問題。無論其意見何若。尙各有一番之研究。今則此等含有研究的性質之文章。幾於鳳毛麟角。不可概見。偶或有之。亦屬聊充篇幅。置之無關緊要之地位。閱者亦絕不注意及之。以問題最多之國家。在報紙上觀之。幾若毫無問題之國家。有之則人的問題而已。未有及於事理者也。就以上三種感想論之。欲不悲觀。不可得已。然此爲一時之現象。苟報界中堅人物。力矯其弊。必有挽回之日。余以爲第一須用力者。萬不可迎合社會。必須出全力矯正社會。在專制時代。所謂逢君之惡。長君之惡。野心家惟知取悅於一人。以達攫奪權位之目的。今日則野心家專務逢社會之惡。長社會之惡。以取悅於社會。而達其攫奪權位之目的。社會之弱點在貧鄙。則以金錢利用之。社會之弱點在怯弱。則以威力利用之。社會之弱點。只有二三。甲方面一度利用。增長一二分。乙方面一度利用。又增長一二分。展轉利用。非至全社會陸沈已。野心家爲權利起見。無所不用其極。吾報界負指導社會之責。何爲供野心家之利用而自失其天職耶。

蔡子民在信教自由會之演說

鄙人今日。因信教自由會新年俱樂部之機。得與國會及報界學界諸君。相聚一堂。誠爲鄙人之幸。竊爲時論今日有請定孔

教爲國教之議。鄙人對茲問題。深致駭異。孔子學問文章。政治事業。朗如日月。燦如星辰。果足爲百世師表。然究竟孔子是孔子。宗教是宗教。國家是國家。義理各別。勿能強作一談。欲明此旨。不可不先一究宗教之原理。夫所謂宗教也者。乃人對於心靈上之一種制裁。此制裁出於自己之願欲。故謂之信仰。上古之世。草昧初開。其民智識淺陋。則見可驚奇疑異之事。信以爲神。崇而拜之。如人之生也。生何從來。人之死也。死何從去。萬物之生生而代謝也。爲之者何人。使之者何意。高山之崔巍。大海之汪洋。雨不知其何至也。雲不知其何往也。迅雷風電。不知其何指也。日月光華。不知其何作也。卽下至一草一木。一勺水。一撮土。其不似乎尋常者。靡不驚而異之。宗教之說。乃從此起。悉天地間有主宰焉。雖大至無外。小至微塵。莫不由其意匠之所告也。此一神教之所由生也。天地間雖一草一木。莫不有其專屬之神。善惡因果之報。不獲罪於鬼神。此多神教之所由設也。生死周循。善惡爲報。卽小至疾病天壽。福禍災殃。莫不有其來因去果。而歸其終點於天堂地獄之分。使人類視聽言動。一循天理之正。雖杳冥不可彷彿。而亦若有戒慎恐懼之心。勿敢爲非作惡。此宗教之所由用也。是故有宗教而天地間一切疑難勿可解決之問題。由其教義皆得以解。有宗教而人類疾病死亡痛苦。一切不能滿足之心慮。皆得於良心上有所慰藉。與之以新生之望。有宗教而人類之善德以彰。惡德以去。乃能戒慎恐懼於其所不覩。凡此者。皆宗教所必具之事實。無論爲耶。爲佛。爲道。爲回。無一或缺者也。其後人

智日開。文化漸進。科學發達。而一切宗教迷信之說。稍稍不足維繫人心。然宗教真理。乃因研究而愈顯。如謂地球之外。尚有星系太陽而成一統。然天地空間之大。太陽系又何懸而何放。何爲而不墮。如謂太陽系外更有太陽之系。繞更大之太陽。而周行不息。以成系統。則雖推而至於十百千萬。仍不足以盡天空之大。仍不足以解何懸何放。何爲而不墜。換言之。仍不足以解大主造之功也。化學發明。何爲而不能造一生物。人類智巧。何爲而不能違反真理。作一事有愧於良知。何爲心忤忤然動。生生死死。往來今古千萬年。果有意識耶。果無意識耶。物類生存。優勝劣敗。人類之始。由猿而漸進。然人猿之間。不能一躍而至。然則必有一物類。介乎人猿之間。劣於人而優於猿。按之天演公理。當少於人而多於猿。今日何爲不見邪。萬物均由其下等者進化改善。而繁其類。然則推而至於最下等最初始之第一物。則又何自而來也。生存競爭。物欲熾張之結果。乃幾幾乎今日盡世界而爲之戰。噫。爲此大試驗者。果屬於無意識之偶然事實耶。抑將由其教訓漸以開世界眞善之門耶。國家之說。爲今至愚。不過我人生長弱國。不能不由至愚以進。雖然。凡是者。今日宗教復興之所由來也。試問孔子之說。果有一足附於宗教之林者耶。彼其所以不廢古來近乎宗教之禮制者。孔子之志果不在乎此。由其說不足以廢我事。因而成之。以濟其扶世長民之術。本不過如是。孰意今日尊孔之徒。轉執之以爲立宗教之本。反乎孔子之初心矣。孔子本身對於宗教。已不啻自限其說。以明乎已之非宗教中人。故曰獲罪於天無所

禱也。丘之禱久矣。敬鬼神而遠之。子不語怪力亂神。且宗教之成也。必自其教主立宗系。創儀尚。崇專拜。孔子無一於是焉。故孔子於宗教。其實體無一備焉。其形式無一居焉。謂孔子與宗教尚有關係者耶。既孔子是孔子。宗教是宗教。孔子宗教。二不相關。謂孔教二字。尙能成一名詞者耶。故孔教二字。不成名詞。按之理論。絕勿能通。至於國家。乃一政治的團體。以政治爲其界線。換言之。即發源於某一土地之人民。欲保持其身體的安寧秩序。集成一大團體。設立機關。確認相互遵守之約。舉任共同信望之人。利行其團體之任務。克達生存之目的。因此之故。雖至犧牲其個體一部分之私權。供益其團體。甘自服從於團體規則法令之下者。在所不惜。然所謂達其生存之目的者。乃謂屬於身體的。非屬於心靈的。屬於世界的。非屬於神靈的。乃謂屬於人類既生以後未死之前。此一段的非屬於人類未生以前既死以後的。國家與宗教。其所以各有事業。相成而不廢者以此。其所以各盡各事分離而不合者以此。宗教之中。有國家無害宗教之事。國家之中。有宗教無害國家之事。其所以相認而互爲贊助者。亦以此。故能講國家爲其界線。即無宗教再爲界線。既講宗教爲其界線。即無國家再爲界線。換言之。既論國界。即不論教界。故不能以某國爲範圍之內。再特指某教而定其如何如何。反之。既論教界。即不論國界。故亦不能於某教爲範圍之內。再特指某國。而定其如何如何。故國教二字。不能相合。合之則不成名詞。強爲名詞。按之邏輯。亦勿能通。鄙人對於時局問題。雅不願與當世名流。有所論列。惟凡事不可不主張我良心學問之所安。不得已而貢其愚陋如此。惟諸君教益焉。